


永年縣志

胡景桂題籤

22.6213
3080-073
25



永年縣志卷二十八


人物傳

循吏

知縣事江陰夏誦鍾續纂



元吳鼎字國器臨洺人元主求通書算學者郡以鼎聞
參謀漢地公事多所全宥至廣平籍戶定賦稱平允為
河南尹勸種植察奸匪設義倉立社學諸路咸取法焉
纂合古今農桑輯要行於世改河北按察副使揚厲風
采不事苛細專警大吏百職凜然朝廷將大用之會疾
卒於官追封壽國公諡恭惠



明申達太祖北巡迎於黑塚坡獻三策上嘉之舉人才
歷知汝甯府加參政時稱清白吏子甯宣德中舉賢良
方正

李仁美字元善隱居好學洪武中舉人才爲考城縣知
縣勸農桑興學校治甚有聲其十一世孫炯以諸生抗
節自有傳

徐敬與肥鄉郭謙共執唐賽兒妖黨事聞謙受永年丞
敬入太學正統間授戶部主事督餉大同轉員外郎進
郎中清理陝右邊儲三年討播州寇敬督餉有功天順
初分督宣府軍儲擢福建布政使惠績廣著于英進士

御史有直聲弟政

政天順己卯舉人歷官西安府知府時三年不雨歲大
饑且亂政賑濟有法禁戢有要民賴以安陞河南參政
祀西安府名宦

賀思聰成化十一年進士任亳縣知縣吏畏民懷以憂
去服闋亳人三詣闕請復任奏最擢光祿寺丞遷少卿
以峭直謫陝西運同操持甚峻又多所興除民立祠祀
之擢汀州府知府以疾歸杜門却掃公事外有司罕見
其面

申綸字廷言宏治乙丑進士爲定襄永康平陸三令舉

廉能第一調太原擢守潞州所至皆有惠政厯戶兵二部郎中出守衛輝政最調常州守作興士類如不及時薛應旂負重望唐順之未知名綸試先唐次薛薛自陳未嘗居人下綸曰唐終當爲子先後果驗一時稱綸知人治行卓異首承宴賚厯四川雲南按察副使致仕歸築南濱草堂於淦水側守令每就訪政要若均田賦開閩河多出其議論居官廉在鄉里有厚德子孫多顯者

子翰

翰字允楨綸之子由監生判綏德州綏城舊無井民汲於郭外有寇警斷汲道輒多渴死翰禱於神穿井城中

綏人德之名申公井遷文安知縣賑饑民多所全活撫臣下其法諸郡以子价貴封中憲大夫鎮江府知府七子价自有傳偉儲僑皆舉於鄉

王朝相嘉靖十四年進士授戶部主事督清源餉以廉幹稱陞四川提學僉事所獎拔士多知名理荒政全活甚多蜀民德之轉大同參議致仕歸杜門却掃如布衣終身

王甯字清一鶴之孫嘉靖七年舉人在祁縣知縣政清平境內不擾調繁內鄉巡按御史有爲同年報怨部民者欲誣以罪甯執不從忤御史意致仕孫熾字晉之萬

三全集卷之二十八
三
歷四十年舉人安貧好學以禮法自繩選安慶府推官
守法不阿失上官意罷歸益讀書賣文以活著有拙齋
文集

馬翽嘉靖十六年舉人任平陽府通判攝守事兼洪洞
臨汾二邑廉平公恕多惠政晉人士至今頌之

楊化字樂川嘉靖二十八年舉人知泗州築石堤一萬
八千丈捍水護城陞河南僉事卓異賜銀幣致仕歸杜
門讀書老而彌篤爲鄉飲大賓年八十卒

蓋光宙嘉靖二十八年舉人爲陳州知州創條規薄稅
賦墾荒田民多賴之子國士自有傳

鄭守道字子中嘉靖三十七年舉人歷歸德大同兗州
府通判陞臨清州知州性儉素樸質所至有政聲臨清
當孔道儲待贈遺舊取足商民守道至悉省之勤於聽
斷案無留牘境內大治以勞卒於官孫之望曾孫茂俱
舉於鄉

陳情字紹山隆慶四年舉人知茶陵州撫良懦戢奸暴
均徭役興學校政聲大著州人立祠祀之陞慶陽府同
知致仕子良貴萬曆三十三年舉人醴泉縣知縣

盧大謨字敬南萬曆四年舉人任新鄉縣知縣興水利
育人才陞甯羗知州淮安同知皆有能名致仕歸置義

田義塾爲鄉里所稱弟大節大順大道

大節字和南恩貢生任臨洮府推官以明允稱丁艱歸不更出祀鄉賢

大順字禮南萬曆八年進士任戶部主事陞蘇州府知府故事機戶供樣絹大順却之自是不復供勦倭寇海上有功調汾州府時汾州新改府大順悉心經理諸草創皆可爲法終福建鹽運使子恢允舉人同知

大道字性南爲汾陽縣丞攝縣事賑荒有法多所全活致仕歸以誠樸率鄉人子愜允有傳

蓋國士字居衡光宙子萬曆十四年進士任鳳陽府推官多所平反嘗覆勘大獄同訊者將爲賂撓國士要與誓城隍之神曰有不公明神殛之乃論如法擢吏部歷稽勳郎中抑請托拔孤寒銓政蕭然

龐進賢字慎吾萬曆七年舉人署冀州校官歷醴泉永和知縣徐州知州所至以清慎稱以禮義開導民煦煦如家人父子旣去爲民所思時有裹糧就進賢家問起居者子化龍早卒婦裴氏艱難撫孤成立

秦效鵬字騰菴萬曆九年舉人任萬泉縣知縣積逋有至十年者鵬至以撫字寓催科民輸將恐後歷官東平知州西安同知致仕歸詩酒自適不涉戶外事

宋文明字龍田萬曆四年舉人任陵縣知縣申明條約
辯白冤枉鞫獄務得其情委曲推詳不以聲色厲人陞
保德州知州致仕歸孫湯孫字汝紹萬曆四十六年舉
人歷官刑部主事豪邁不羈能詩工草書才名藉甚
張五美字肖山萬曆十三年舉人任山西武鄉縣知縣
廉明不擾陞常州府通判有政聲

宋師程字定門萬曆十四年進士任歸德府推官多所
平反擢戶部主事權臨清關爲平準法參用銀鈔貨不
以改折困商轉郎中督倉德州令解納自爲量兌倉儲
以裕出爲嘉興府知府舉卓異遷太原兵備卒於官祀

鄉賢

劉尙卿字玉崗萬曆四年舉人署南樂教諭造士有方
陞宜陽知縣政簡刑平期年間招撫流移二千戶墾荒
田無算民李永大冤繫二十年尙卿爲辯釋歲省貼馬
起解等費萬緡宜人尸祝之致仕歸杜門教子著有玉
崗文集家訓詩脈子慶孫孫鏡鎡皆舉於鄉

李韞秀字和都萬曆二十五年舉人任平陸知縣再補
長清皆有政聲陞東城兵馬指揮戶部主事卒祀鄉賢
子仲熊

繩愆字忠袞萬曆十年舉人累官威茂道副使威惠並

著與平奢崇之功愆性孝友俸入與庶弟共之致仕歸一榻蕭然不蔽風雨

武定邦字鳳池萬曆四年舉人任濟源知縣有治績陞南康府同知郡多盜定邦歷險周巡創立亭柵哨軍得所據警守嚴盜無所容郡以無事丁艱歸卒

胡謐字清宇萬曆十九年舉人除介休知縣訟簡刑清與民休息獎拔士類多所成就終刑部主事

胡棟字隆菴瓚之孫歲貢生甘貧力學以產讓諸弟爲林縣知縣有能名邑苦乏水棟爲鑿井相其山泉高下導之入田種稻民德之致仕歸里居三十餘年年八十

七歲卒

李春萼字韓林杜之子萬曆四十年舉人任新泰縣知縣新泰當殘亂後民流地荒春萼殫心招徠增戶二千墾田三百餘頃加派議興括庫貯無礙銀以抵民得無擾遷忠州知州撫石碓土司有方卒於官祀鄉賢子濬舉人任知縣澄進士兩任饒州松江推官明斷平恕壯年引疾歸

王萬祺字順山萬曆十六年舉人任夏津縣知縣邑濱通惠河時殿工大木沿河北運需役三千人他邑皆預僉河干以待萬祺縱使歸農踰年木始至省勞費什九

又以官牛孳犢爲保馬遺法申撫按請變價歸官陞太倉州知州補沂州二月蝗爲災未幾大雪皆僵死遷淮安同知以疾辭不赴予奮庸字光恒萬曆四十六年舉人歷瑞州鳳陽推官攝廬州府知府勦流寇全城督修陵工行取未赴卒

杜汝慤字太初秉彝孫萬曆二十五年舉人知沁源縣調襄垣豪家殺人賂汝慤正色叱之論如法陞大同府同知鎮左衛清冒餉補逃丁造營房制軍器甚著勞績晉戶部員外郎陞郎中管寶源局當代以稱職復留出爲鳳翔知府丁艱歸不復出日危坐讀易手訂義文二

卷孫震遠順治十五年進士霽遠字長虹順治四年進士歷安化沂水知縣有能名

盧恢允字元兌大順子萬曆四十六年舉人署聊城縣教諭課士勤擢平陽府同知攝知府事治勤幹所屬無留牘督修甯武邊備有功流寇北渡當事以恢允練習河防事疏請久任以勞卒於官

秦德光字端明效鵬子萬曆三十七年舉人署邢臺教諭陞大同推官以防禦功當遷總督使監軍入援昌平疏請留贊畫軍事陞懷隆道僉事病歸再補肅州道副使歲餘卒子鼎樞歲貢生仕至濱州知州

國朝胡鳳閣字君榮棟之孫歲貢生崇禎中爲濟甯州知州順治中任濮州知州陞鄖陽同知丁艱歸再補開封同知撫荒殘除盜賊戢叛兵陞廬州府知府治尙寬簡廬人愛之以自奉薄稱長齋太守著有伏櫪齋集

李仲熊字滄嶠韞秀子崇禎四年進士中書舍人順治間官御史巡按廣西劾貪墨尤著者餘親加訓迪所至肅然辨釋冤獄數大案以母病乞歸寘義塾義倉開廣仁聞資灌溉鄉人德之子帥正字子臨以孝稱成康熙庚辰進士著有四書藁

王宗字秩宗拔貢生任江南宿松縣丞值胡廣兵變漸掠及宿時宿令以事出宗料民爲兵朝夕訓練爲城守計賊至黃梅聞有備引去宗博學能詩著有敦好堂詩江南課俊藁左傳一得杜詩箋釋

王謙字六吉康熙六年進士任湖廣城步令苗寇攻城謙率士民登陴拒守出奇兵破之城賴以全擢刑部主事尋遷戶部員外郎陞郎中庚午典試兩浙辛未提學江西事竣爲陝西邯山道改淮陽道參議

趙懋字素心康熙八年舉人任雩都縣知縣勤於政事救災有法獎掖士類多所成就


和氏璽字璧沙幼聰慧九歲能屬文康熙三十年進士

授閩縣令勤於爲治革火耗除加派閩人德之以里誤
罷官復起爲同安令時泉帥某恃勢病民氏璽力與之
抗卒得直以勞卒於官

劉廷瑛孝子世芳之孫以孝友稱成康熙三十三年進
士除廬陵縣知縣潔已愛民賑饑有方多所全活葺學
宮除漕弊治甚有聲

路可大字清元拔貢生任長沙府善化縣縣丞署臨武
縣知縣廉明愛民政聲大著甫一年代去邑人攀留者
遮道立石以紀後卒於湖南

楊殿邦字蓮峯道光十二年進士任山東青城縣知縣
縣故多盜乙未歲饑土寇蜂起設捕緝賊夜嘗馳驅數
十里勦賊巢賊始息設賑放粥恩威並用民咸感焉甲
午乙未丁酉科入闈分校所取皆知名士設立書院課
士以立品爲先二十年卒於官東省稱清操焉



永年縣志卷二十九

知縣事江陰夏詒鈺續纂

人物傳

篤行

金劉政涖州人性篤孝母老喪明政每以舌舐母目逾旬能視物母疾晝夜侍側衣不解帶割股肉啗之者再三母死負土起墳鄉鄰欲佐其勞政謝之葬之日飛鳥哀鳴翔集邱木間廬于墓側者三年防禦使以聞除太

子掌飯丞

金史孝友傳

元龐遵文宗至順間母病腫不能起思食生魚遵求於

市不得求漁者又不得歸塗歎恨忽有鯉躍入其舟歸

作羹以獻母病尋瘥

元史孝友傳

明楊忠正統間任錦衣衛百戶性至孝父喪廬墓三年

有司奏聞旌表

明史孝義傳敘

秦良諸生善事父母父喪廬于墓菜果不入口有司奏

聞旌表

張問政諸生父邁危疾籲天乞以身代父歿與弟敷政

廬墓三年

朱雱少孤事兄如父性耿介篤志學問以歲貢任陝州

同知十餘年致仕歸力田課子足跡不入城市有餘卽

以予鄉里貧乏者

申廣字德溥任靈璧縣主簿性仁厚與物無忤清潔自

守無敢以私干者致仕歸量其子之才力分事教督之

後皆有成卒年八十有二以子綸貴贈如其官

申紀綸之兄事繼母岳氏以孝聞繼母歿哀思終身孫

佐自有傳

胡應聘字子儒父璣以平亂功廕一子錦衣千戶應聘

兄欲使應聘襲不受時兩賢之仕吳江縣丞以廉稱

宋學易拔貢生早歲失恃與兄學道廬墓于漆泉寺廢

視聽絕思慮泣血三年李德性石橋碑文記其事後任

鞏昌府通判祀鞏昌名宦祠

申羽字允翔諸生慷慨好施與以周給貧乏散千金產環堵蕭然畧無悔色

盧廷珠弱冠一應童試遂棄科舉業讀書學道延致四方名士與議論上下戚里婚喪之費資之者多稱厚德焉以子大中貴贈工部尙書

申化字幼岩幼孤事母以孝聞兄俸歿撫其女如己女掘地得藏金以爲不祥掩之濟貧乏如不及子佳允貴贈如其官

李春華字秀林杜之子以孝友稱父歿撫兩幼弟甚篤後皆顯貴春華好施與至賣田拯親友急以爲樂後任洧川主簿有惠政

杜汝亮廓之子萬曆二十二年舉人事繼母申氏孝常坐一小閣篝燈夜讀母不命之寢不敢寢母色不豫卽長跪竟日母悅乃已除雒南縣知縣攝商州知州皆有能名

張楷字惠我萬曆間諸生尙行檢不輕爲然諾友人蓋某私以千金寄楷家楷中風將卒急呼友至以手指藏金笥家人開之則寄物封識宛然友持去楷遂卒

冀一貫家素饒裕樂施與每冬春貸貧戶粟至熟而償

不能償者輒爲折券常拾遺金待其人數日還之以孫如錫貴贈太常寺卿

李養廉字太素兄養冲弟養志皆爲大官養廉被服如寒素敦禮讓人稱長者年八十四卒祀鄉賢子芳塘崇禎四年進士歷章邱夏津知縣有能名芳淮字浦珠天啟七年舉人掖縣知縣亂後閉戶養病以詩文自娛著有卧雲齋集

李養默廩生兄弟七人養默最少事生母胡氏敬養兼至四十年如一日母八十二卒養默哀毀骨立

宋如濂學道之孫居臨洛鎮崇禎十五年寇執其父頤恪將殺之如濂以身蔽父遂同遇害咸豐三年有宋紹泰亦洛關人粵逆破關紹泰代父死

劉鑑字珍思諸生有至性兄鏡字涵思天啟四年舉人爲鉅野知縣罷歸甲申之變流寇挾之西行鑑毀形墮其後卒與兄俱歸時人歌詠其事哀爲義棒集義棒鑑所持自衛者

郭嘉言有厚德嘗輸穀百石賑饑十日有無賴子罵于門嘉言閉戶不與較罵不已嘉言自持飲食出奉之曰得無饑渴耶其人慙謝長子恆祚以孝稱

徐起鳳本金陵人傭書申佳允家甲申春佳允殉難僮

僕皆亡去起鳳守佳允樞朝夕泣未幾賊自關門敗還
焚宮殿民居有來焚佳允寓者起鳳泣懇曰吾主忠臣
樞在內幸留之賊以刀背擊之終不去賊爲感動得不
焚

國朝葉桂字潤甫歲貢生讀書務實以謹樸爲鄉人先子
騰鳳字瑞虞順治二年進士任陽信縣知縣以慈惠撫
民盜賊屏息擢淮安同知丁艱歸遂卒騰鳳嘗捐金修
盜河便民聞鄉人德之

段汝厚字還樸諸生時上黨未靖遣軍征之兵還過洛
汝厚贖還上黨難民數十家有老生夫婦被繫汝厚贖
之入金不可益以四兵主疑其惑也詰之得實乃大悔
遂諾其贖老生有子亦在俘中求不獲兵主更引老生
夫婦至都爲訪其子資而遣之老生後至汝厚家出一
圖繪汝厚與汝厚子受采受色老生夫婦拜其下名拜
恩圖顧汝厚忘之久矣名人稱厚德以汝厚爲最元孫
三元舉于鄉三才成進士

劉楷字望瀛歲貢生任隆平訓導陞沙河縣教諭推產
讓弟撫孤姪甚篤族人貧者賴其周濟任沙河時司李
欲害某生楷力拒之得已遂歸年八十五卒

甯光祖字質菴三歲失怙事母至孝菽水承歡五十餘

年與弟光允相友愛財產皆共之性慈不殺生行步視
蟻蟲教子嚴而有法遭母喪以毀卒子爾講有傳

爾講弟爾讀字笈箱任南樂教諭考選內閣中書孝友
著聞爾講以言事獲罪妻子徙遼東爾讀力營贖得還
姚遵祖字憲甫郡庠生少孤力學性端介動必以禮與
諸弟分產擇取其薄者年九十餘卒子唐衢能詩

張盧字涵冲歲貢生敦厚慈良與人無忤施藥粥費無
算歲饑出錢米予饑者崇禎十三年癘骹骸甚多淫
水決利民聞貸百金葺治鄉人賴之盧家竟以行義中
落不顧子佑後康熙壬子舉于鄉里人至婦樨相賀如

其私親

劉世芳字美之母病篤日夜籲天求代夢神令服女貞
實服之果愈巡按御史疏聞 旌表

程仲字繼伯事繼母以孝聞兄卒奉嫂惟謹孝友之稱
甚著

吳本宗歲貢父歿與弟本鉢奉繼母盡孝本宗年三十
五喪妻本鉢年二十五喪妻皆以有子不更娶兄弟食
同案寢同榻者四十年

劉桂字仲謀文名甚著性慈厚不以口腹殺生康熙二
十八年失明往來親友家仗一童子行口占詩文使人

書之逾二年復愈人以爲厚德之報

王辭輯諸生天性純孝事母與兩繼母皆得歡心繼母郭氏得癩症辭輯侍湯藥未嘗廢離雍正十三年旌表

劉起玉母王氏中年廢疾起玉跬步不離者數十年母年八十六卒兄起祿三子起玉子一將析產起玉執四分之起祿不肯親族議三之以二予起祿成起玉之義起祿卒喪葬之具起玉伙助爲多起祿子璟亦以孝友稱父病痢三年母亦瞽璟侍湯藥未嘗解帶分產四十畝輸入畝爲祭祀家塾之費親族翕然稱之

祁琨字嗣章幼孤從兄瑤撫之成立與瑤析產以瑤家口衆所取甚少瑤執中分之琨不可終如其志琨後以餼滿充貢子年豐

年豐字盛公以貧學醫年二十母卒父不再娶年豐固請繼母侯氏生子年成九歲父歿年豐事繼母以孝聞撫年成成立爲己改業故勉年成讀書成父志言之輒泣年成以是勤其業乾隆五年舉於鄉年成字聖選事年豐甚謹鄉里交稱之年豐先母卒瀕危惟屬年成善事母無他言年六十有六子六三爲諸生

弓志勤與弟志儉相愛同居五十年臨析產以弟子孫

多推祖產悉予弟乃以五十年所置產中分之志勤無子以金四十買一妾方待年妻生子遂以女歸其父爲折券屬其父勿嫁爲人妾志勤旣歿鄉人稱厚德不衰劉好義性孝友父母歿撫其兩弟成立友愛無間好義有八曾孫兩弟亦皆有孫四世近三十口終不忍析居門以內無語言相爭者人稱義門乾隆二十一年好義年七十七矣

張炎諸生以孝稱以醫濟人不論財九十四卒

苗穉字菽施歲貢生以孝稱撫兩幼弟穉和成立穉任景州訓導改甌寧縣丞和亦以拔貢任廣昌縣教諭

趙璟諸生幼孤事母武氏以孝稱乾隆十五年年七十餘迎

駕賜金

李克義性忠實耿介孝親悌長樂施惠於鄉里有貧乏者量力周濟無德色從不與人較曲直中年乏嗣買幼女以備側室至四十三歲生子遂撫女爲親女及笄擇配厚其奩而嫁焉

李懷德事母孝母病思食肉家貧無措割股肉奉之母遂愈

李光澄字清泉郡庠生五歲喪母二十五歲喪父事繼

母如生母五十餘年有異母弟一妹四愛如同胞分家時讓美田宅於弟妹夫殘廢逃出不歸迎養終身

韓希福字景虞乾隆乙卯副榜孝行甚篤潛心經籍授生徒多所成就輕財仗義施予無算里黨至今稱之年七十三歲卒

王新圖監生性溫厚好義樂施子元龍元勳俱入武庠元龍授職衛千總乾隆五十七年大饑新圖出粟二百石錢五百千按名賑給全活甚衆臨終謂長子元龍曰吾生平不樂爲不義汝姪五子一後日何以處此元龍曰父無憂必不使弟困新圖卒元龍悉以良田美宅歸

元勳元勳亦慷慨有氣節濟險扶危尤重倫理鄉有王培顏者嘗鬻妻質旣成或以告元勳元勳出資償其值復責以義而周之粟一門三義至今猶傳

李保忠字蓋臣性直樸敦孝友輸財仗義鄉里稱善士年九十歲時乾隆六十年府縣保舉老民兼有德行者以保忠應選入都

賜宴

呈極殿給頂戴各物及盛世麗眉匾額年九十四卒

王守業性狷介取與不苟乾隆五十五年耕田獲白金三百兩票錢五百千失主尋至盡數與之賈人靳興隆馬驚車覆遺皮囊于道適守業晨往見之移竄田內二

日後興隆至欲與均分峻辭不受四世孫朝佐于同治十年十月拾獲錢票十二千訪知爲龍泉孟維準所失如數與之人以爲猶有乃祖遺風云

趙含貞字祥生性孝友與弟含珠含斌同居終身含斌子錫齡字壽昌武生錫璠錫元俱以孝友聞錫璠中嘉慶丙子副榜錫元以明經終錫齡治家謹嚴五世同堂共爨者千人門內無間言錫齡族弟奇文國子生精醫術咸豐六七年間土匪蠶起奇文聯合十二村人團練並與錫齡捐穀賑濟人賴以安

傅相如字慶溢庠生少孤貧年十九訓蒙養母與兩弟友愛三十九歲始入泮相如晝課生徒夕侍母側候兩弟歸聚談而後寢有古人風舉人高守貴李玉振劉浩等俱出其門

武大勇字德剛少業儒體羸廢讀改習騎射弱冠入郡庠性慷慨遇事果斷有爲能得大體有艱巨事郡司必延主辦從容措之裕如也尤喜排難解紛邑人因爭產幾構訟得大勇一言立解輕財好義累散千金有以患難告者雖非素習必極力拯卹之敬禮士人子姪欲習武輒禁止曰吾已誤爾曹不可再誤也軼事甚多邑人至今稱道不衰子烈煦俱游庠

烈字丕承邑庠生性質厚寡言不輕喜怒事親至孝體素豐遭母喪哀毀骨立生平不妄交惟與同里夏發榮稱莫逆儕輩或以非禮相加怡然任之久則人人感服卒年三十三歲聞者莫不太息子澄清汝清進士河清廩貢生

申承曾字佑啟嘉慶辛酉拔貢生事母至孝授徒臨洛鎮聞母病徒步夜還車馬追之不及與朋友交肝胆相照未嘗因難而避嘉慶十八年滑縣失守郡城戒嚴銳身任城守人恃以無恐後任容城縣教諭

連士明字鑑別慷慨好施嘉慶十八年七月適野觀稼

遇韓氏孀婦哭甚哀問其故曰家無升斗子女無以糊口欲男僧女尼自投生路是以悲耳士明給錢二十千令男傭女配後韓子成立還錢士明不受

王用賢字尚德嘉慶癸酉舉人少失怙教讀養母事兄用安用和維謹大挑一等授順義縣教諭母年高不欲往遂解組歸仍授徒以終其身

高守貴字杏梁原籍宛平自其父遷家于永天性純摯幼卽嗜讀登嘉慶癸酉舉人任安肅教諭薊州訓導順德府教授所至之處必繕葺文廟並督修順天府文廟捐俸工辭保獎府尹汪本銓贈聯潔已奉公有功不伐

尊師重道見善則遷汪公固不輕許可者也先是任安肅時官禁彌勒教鄉民因訛言逃散親往撫諭衆賴以安復奉檄襄辦東三省過路兵差擬章申請上官嚴禁擾民兵至咸奉約束性仗義同官喪不能歸者傾貲助之咸豐戊午旱土匪竊發大兵集順德尅期聲勦力請先發賑以安民心全活者甚衆子甲貢生辰監生炳巡檢孫蓉鏡壽鏡心鏡皆廩生明鏡廩貢人鏡舉人

夏發榮字蔭軒道光元年舉人少聰穎簡重寡言笑不妄交游事母至孝篤于友誼與同邑武烈同游保陽李百泉先生之門以學行相切劘烈病故子澄清等幼召至其家授學焉澄清汝清俱成進士內姪劉浩亦從學中道光戊子科舉人家居事母不樂仕進子彝舉人孫蘭升家升俱遊庠

杜一柱字承宣幼失怙事母至孝母歿爲位祀之出入謁告終其身讓產兄姊疏食飲水泊如也性汎愛親友以緩急告者傾貲賜給嘗掌紫山書院所得修脯悉葺生童講舍工竣卽辭去曰吾之就此正爲修院計耳今事已畢則此席應令貧于我者處之奚可據以自利哉郡城各廟停棺七十餘與同邑武澄清謀捐資悉殯之樂助者衆則並臨洛鎮停棺亦殯之因請官示禁喪禮

糜費風俗爲之一變郡邑知一柱端方耿介凡修堤城垣祠廟諸工必俾司事咸豐七年饑總理賑務積勞至失血雖鄉愚婦豎皆知杜先生無毫髮私怨言不起後來者莫之及也咸豐元年以明經舉孝廉方正辭不赴部試生平好讀宋儒語錄及孫徵君理學宗傳等書內行修謹子孫皆循循有矩度子若洲庠生孫信義仁義舉于鄉

祁廷璐字國寶琨之裔孫也增生性純篤暑年好學孝事母友待諸弟田廬服物取少受惡人以爲有祖風與杜一柱友善卽一日數見未嘗不以禮貌修府縣文廟

城隍廟築護城大堤補葺城垣皆與一柱協力成之邑舊俗多停棺不葬與一柱議立條規崇儉約黜浮費並手書勸葬文徧貼通衢無力者復酌助葬資邑人翕然樂從自後遂無停喪者家居和平樂易未嘗以言色加人而人多帖服有時排難解紛雖强悍桀驁之夫莫不怡然聽信自奉甚儉親族貧乏者無不量力周給兄弟分爨後有夙債自出金償之喜吟詠工書子德昌進士孫榮縉舉人

教其相字友質道光五年舉人性篤厚樂易睦于族黨教讀成就甚多歷官河間東光縣教諭子福謙舉人

李玉振字粹崖道光十一年舉人天性友愛爲學遠於
理境教授生徒不計束脩有無成就人才甚多子吉言
進士審言庠生俱官知府

游清思清彥弟母歿號泣不食曰吾將侍親地下即日
卒

鞏忠臣字良弼爲人排難解紛一鄉咸息爭訟咸豐七
年饑捐設粥廠食餓者存活無算子八人占龍庠生占
雲武舉精騎射維翰武生孫其祥庠生

王節字正用武生捐莊房八間爲義學修金膏火稟縣
立案邑人武澄清爲撰碑

魏連魁字文元庠生專心學問嘗捐地三畝立敬惜字
紙社憫無業商民死無所歸又施地作義塚邑人武澄
清程宗伊爲撰碑子詩儉廩生克成厥志善誘後進鄉
里推爲長者

張錫齡字壽山無子以地十七畝施爲義學

郭自新性孝友早喪母父繼娶生二子後繼母與其父
謀析爨自新泣諫不從書分單三俱老牛配羊圈令自
取鬪因譁言命劣自新婦不願告以父命勿多言即攜
妻別居晨昏定省無缺二弟得田二百畝後俱無子以
自新子爲嗣至今子孫蕃盛

張書謨與其兄書典各析產分居後其兄負債幾傾產
招與合爨書謨治家勤儉後漸裕盡代兄償宿負仍以
已產十分之六與之一鄉推爲盛德

閻璋字禮隆年十五歲祖與父俱染重病遍謁各醫跪
繼以泣湯藥親奉衣不解帶者年餘異母弟年五六歲
撫養成人課讀甚勤始終無纖芥嫌七十一歲卒子存
仁廩生

李膺時歲貢生三歲失怙弟待時猶在襁褓暑年卽知
友愛人以爲有推梨讓棗之風稍長貧無以自給弱冠
入邑庠授徒養母課弟同居共爨始終無間顧誨之也
嚴跬步踰禮法輒遭禁止待時以鄉舉官豫膺時竟以
明經終老性汎愛戚友告貸者未嘗拒而取受特嚴非
其義也無敢以一介浼者光緒元年赴試中暑道卒邑
人士無不歎息

武起家貧牧羊於南壇路側獲遺金一囊候至日暮
見一人倉猝至詢知爲失金人舉金還之不問其人姓
字分之金亦不受

席黑子年十一歲父母家貧流徙黑子依舅氏存活至
十七歲乞食尋親達京都又投塞外一日在廟中哭禱
有老人來問里居姓氏告曰某村有一婦女爲廣平府

人往尋見果是其母背負行乞而歸又入京尋見父
堅不回黑子歸里越數月又至京都尋父未遇以疾卒
韓清福村農韓天慶義子六歲撫養爲嗣天慶夫婦年
邁孝養承順遐邇稱之光緒二年正月母韓李氏病割
股肉和藥以進沈疴立起無不歎其孝而神其事也因
援前志載劉好義生存之例附錄之

永年縣志卷三十

知縣事江陰夏詒鈺續纂

人物傳

儒林

隋郭懋廣平人明習左傳授昌亭劉焯

唐賈公彥永徽中爲太常博士著論語疏十五卷周禮
疏四十卷儀禮疏五十卷禮記疏五十卷發揮鄭學最
爲詳明子大隱以經義世其家自有傳

明申寧達之子內行甚篤沈志經籍於詩書尤長時稱
二經先生宣德閒舉賢良方正至京師引疾歸於聖賢

之學終其身不倦

李應乾字德剛嘉靖中爲諸生力究性命之學行已有律度以春秋授鄉人從遊者多掇科第應乾竟以諸生終以子杜貴贈潞安府知府

霍時敏字遜齋精於三禮教授生徒多所發明以歲貢爲武安縣丞

李德性字山泉萬曆十三年舉人篤志經籍歷洛陽儀封知縣多惠政致仕歸杜門著書有了葛子諸集行世宋學道字仁宇范次子母成氏卒廬墓側三年讀書務究核各理不專事帖括萬曆三十八年成進士歷長子

封邱知縣道民禮讓致仕歸搆八卦廬洛水上生徒百餘人發明格致精一之旨稱哲陽先生著有中語心語仁義禮智根心解廣道詮與學社編

申靈允字洙源萬曆四十三年舉人邃理學主反己力行教授生徒多所成就歷鄒縣扶風知縣未幾罷歸以講學爲務臨終大書順受其正無忝所生不愧不怍何怨何尤投筆而卒

王立極字範用諸生博學強記每至一處必散步背誦一書乃去偶友人史記闕一頁卽爲書之無誤晚尤邃於易年八十餘卒著有易經解惑讀易隨筆大學膚見

若干卷

國朝楊宜準字爵甫諸生攻舉子業以易經應試入山研作經藝遂漸窺易理爲鄉里學者所宗爲文有所發明於所居後闢柳陰堂授生徒多所成就族黨婚葬殫力仗助至稱貸爲之歲饑出粟濟餓者全活甚衆乾隆十三年卒子希堯雍正二年舉人

閻斌字允中貢生事母至孝嘗命赴市買蔬菜遇鬻者於巷不顧竟至市買歸邑人至今樂道之學以存誠爲主尤精於易手畫羲爻錯綜參伍羅陳几案每精思達顯以求道之所在學既通涵養益粹人或以爲迂莫之測也教人先躬行而後文藝平生未嘗言仕祿受知諸城劉文清公欲招至幕中辭不往筮知諱日至期卒著芸窗易草四卷邑人武澄清爲梓行之祀鄉賢

李汝霖字說旃年十四歲游庠嘉慶三年舉人邃理學性沈靜教人以立品爲先不重帖括著有駁涅槃經序朱子綱目約錄西塘詩草晚年疏列四事欲上不果愛陶詩及邵子擊壤集尤愛陸宣公奏議年七十歲卒子秉銓孫膾皆邑庠生

王思禮字修耕嘉慶三年舉人學問淵博著易象淺解卦詮爻釋援引史事親切有味官錦州教授訓二子嚴

俱遊庠

傅朝選字清弼貢生髫齡遊庠文名噪甚負經濟志屢試不售五旬後靜坐恍若有得讀姚江書大好之暇輒與人講解世或非笑不顧也子襄舉人

永安縣志卷三十一

知縣事江陰夏詒鈺續纂

人物傳

文苑

北齊荀士遜廣平人也好學有思理為文清典見賞知音武定末舉司馬秀才迄天保十年不調皇建中馬敬德薦為主書世祖時轉中書舍人狀貌甚醜以文辭見用曾有事須奏適世祖在後庭因左右轉通者不得士遜姓名乃云醜舍人世祖云必士遜也看封題果是內人莫不忻笑後主即位累遷中書侍郎號為稱職與李

若等撰典言行於世齊滅年卒

唐高正臣永年人聯姻帝室官至衛尉卿寓居洛陽善詠愛客一時名士多所交接習右軍書法睿宗最愛之金陵棲霞寺有所書碑

司空曙字文明廣平人大厯二年進士與盧綸錢起等號十才子貞元初韋皋鎮劍南招致幕府報政授洛陽主簿遷水部郎中尋改虞部常僑寓南國有江園江村諸詠天性沖淡詩如其人集六卷傳於世

明郭文德字子明劉基稱其詩不尚險澀不求奇巧惟心所得因言成章而其自得之妙則有獨知之者

姚志昂字與山選貢生有異質工文翰嘗纂修清河縣志邑大著作多出其手除鄆城知縣未赴而卒

申偉字明巖价之弟嘉靖二十八年舉人天才別出軼宕不羣所作詩詞小令至今人樂稱之

盧重華歲貢生任均州學正修太和山志陞河津令多惠政轉慶陽府通判督鹽池以廉稱檄攝知府力辭以親老告歸著有警心語錄詩草

馬出河字文初翻子監生授鴻臚寺序班博學能詩文兼善書畫里稱三絕子逢伯亦有文名

胡璿字明山尚書璿之弟博學尤精二戴禮以歲貢授

祥符主簿上官屬撰記應時立辦開封諸屬志多所裁
定年七十吟咏不倦孫士偉天啟元年舉人任蒲臺縣
知縣祀鄉賢

李廷華字對溪隆慶元年舉人知新蔡縣以清惠稱陞
鄖陽府通判致仕生平好為詩古文詞於宦情甚淡里
居卻掃吟嘯之外都無所與

申中清字友石嘉靖二十五年舉人博學善屬文清脫
爽健任莒州知州未幾歸徜徉林壑杯觴吟咏無虛日
弟中道嘉靖四十年舉人里稱二中

程光漢字斗賓歲貢生博學能文任諸城訓導山左諸
邑志多經裁定上官薦其才徵修國史病卒於家孫調
羹萬曆三十七年舉人任卽墨縣知縣

宋學韶字和宇萬曆四十年舉人學問該博從游問奇
者無虛日踵門求詩文咄嗟立應兄學道萬曆三十八
年進士弟學易選貢生兄弟文名學韶為尤著云

申璇字華玉天啟七年舉人篤志經籍為文有所發明
從游者多顯

劉慶孫字克成尚卿子崇禎三年舉人嗜學不倦為文
根據理要為後進師法著有四書集註考詩經集註考
益堅詩鈔雪齋寄筆唱隨集菊詩千首子鏡有傳從子

鏡與鏡同舉於鄉

周之氏字節山萬厯間諸生博學能詩工草隸篆書詩
即物寄興有體裁著有鸞鳩集落花詩三十首傳於世
鄭之望字惠圃守道孫天啟四年舉人以孝友稱性孤
峭沈志經籍爲文雄灑深邃屏絕陳言構碧雲閣延名
士與之遊以攻苦卒著有木石居藁子茂順治十四年
舉人

白南金字礪甫性倜儻不羈少爲諸生不喜事帖括旋
棄去專肆力於詩所著自成一家言脫去窠臼趙儕鶴
魏懋權李霖寰諸先達皆亟稱之有沼詞二集行世

盧愜允字省潛大道子天啟四年舉人性謹和終身無
疾言遠色以孝友稱爲文清麗脫俗務絕陳言崇禎中
以士風澆敝命舉人隨有司考察擇其尤賢不肖者以
聞巡按御史舉愜允畿輔第一有制義藁行世

國朝王訓字見全歲貢生博學善屬文除訓導不就教授
生徒於理學多所發明姪以恩字霖蒼亦有文名順治
辛卯副貢生

李芳莎字臺辰養冲季子拔貢厯鄆城武鄉知縣皆有
惠政陞柳州府同知未赴罷歸芳莎資賦本中人然好
苦學經史百家之言皆能上口爲古文詞淵渟無涯際

詩格沈雄步趨少陵為多宋相國權王宗伯鐸極重之
嘗為相國草謝

賜大

內書畫表揮毫座上疾如風雨輦下侈為美談著有準勅
草威如堂詩文行世

申涵光字和孟別號鳧盟父佳允前明忠臣涵光與雞
澤殷岳同邑郝挺劉璇李炯為友制義外兼攻詩古文
詞聞父殉難慟而絕者再扶病往迎父柩會義僕徐起
鳳以佳允極至涵光自是絕意進取浮沈諸生間順治

九年

詔

故明死節諸臣諸司上佳允名或誤列為自縊死事中格

涵光徒跣行泥淖中千里抵京師麻衣經帶慟哭都市

具述其父於王恭厥投井狀時給事中魏裔介疏白其

事會涵光至益信在位多高涵光孝行折節與交涵光

歸奉母讀書親教兩弟涵煜涵盼皆知名涵光稱詩里

中與同邑張蓋雞澤殷岳曲周劉逢源邯鄲趙湛相唱

和號廣平六子名滿天下而涵光稱為大宗畿輔詩派

實自涵光開之十三年偕殷岳見孫奇逢於蘇門執弟

子禮奇逢改容禮之語達且自是益留意天人性命之

旨不復為詩十八年貢成均投牒謝病歸康熙十六年

卒著有文集四卷聰山集八卷說杜性習圖義利論荆

園小語進語若干卷殘彙四卷弟涵煜涵盼

涵煜字觀仲從涵光學好古文辭弟涵盼早達而涵煜久困場屋不顧涵煜兼工書妍媚道勁類趙文敏涵光每泣曰先端慙當盡節爲仲加冠禮仲勝阿買十倍兩端慙不得以張吾軍痛哉涵煜亦不勝悲康熙五年始舉於鄉遂絕意進取兄弟相唱和以終著有敏菴集江航草通鑑評語魏相國裔介序其詩盛推許之子頌自有傳

涵盼字隨叔蚤歲師涵光時涵光稱詩河朔所與遊皆一時名士壇坫甚盛涵盼力與追逐殷劉諸人皆目爲

畏友涵盼以其餘力治舉子業輒精名籍甚順治十七年成進士授翰林院檢討充

國史館纂修官鍵戶著述勢要之門未嘗一往謝病歸益肆力經史時廣郡文獻凋缺涵盼極意蒐稽如雞澤殷之鈕殷岳殷淵永年蔡國熙李春蓁張蓋等軼事皆賴以傳康熙丙辰輯郡志稱完書著有忠裕堂文集史籟等書子顥康熙四十四年舉人亦能詩孔廣棣曰涵光在里中友甯爾講元著張蓋覆輿從受學者爲兩弟與姚昇東巖皆以詩文名家卓爾可傳者也崇禎末造涵光共學者四人惟郝挺無傳李炯火天以諸生抗節先

端愍死劉璇章思致命沁源在涵光負勝名時殷岳伯
巖以氣節文章與涵光並雄長河朔賢者以氣類相聚
信哉

趙湛字秋水其先邑東大由堡人後徙邯鄲攻舉子業
不售陶情詩酒與申鳧盟觀仲張覆輿爲詩友稱莫逆
性豪放周覽天下名山所至公卿爭倒屣焉晚年留心
理學恨不獲與夏峯先生講明性命道德之旨作省心
吟十二章以見志著有玉暉堂詩集六卷今存

姚昇字扶東幼孤家貧讀書不事章句文奇肆學爲詩
從申涵光兄弟切劘遂工有宅一區田百畝皆以讓弟

攜妻子僦居授徒自給嘗遊京師衣大布衣抗首公卿
閒議論風發或疾之試以詩操筆立成奇氣迸溢名遂
大起康熙十一年舉京兆南遊江淮泛湖湘作詩益多
所歷勝地與名人唱和輒擅場選德清縣知縣德清歲
大祲未報方徵賦昇至力請賑全活無算目睹民艱有
所作皆哀苦語德清士大夫比之元道州春陵行調開
化催科不擾公退焚香拂几檢詩囊長吟而已罷歸貧
甚或餽粥不給怡然自得世以此多之昇鬚髯如戟顧
盼自豪詩文如其人嘗題毛遂塚云囊錐曾笑三千客
按劒寧同十九人前後吟者皆出其下詩有東巖草文

不概見云

冀龐齡邑人順治甲午舉人父蓋廩生有學行龐齡潛心性命之學文平實有所發明任河間故城教諭課士有方文風爲之一變著有四書講義

鄭茂字子勉永年人幼孤母守志其大父督之嚴夏楚無虛日自塾中歸有精義未晰與母相持泣母更慰諭使勤學與申涵光同巷居日袖書往來莊語正色相對晨夕患難疾病皆共之涵光博學茂務精專各自得也精制舉業刻以傳涵光序之順治十七年舉於京兆任武平縣知縣一年卒涵光稱其詩似諸光義渾淪大家其氣蒼栗然以治舉業故不能專力傳者甚少

楊文華字彬然康熙五年舉人有文名教授生徒多所成就康熙二十九年鄉飲正賓著有幼學定式

靳紫垣庠生安貧好學事繼母以孝稱教授生徒多所成就工詩有白燕來巢鄙人皆爲詩紫垣第一精醫術藥餌濟人不索值康熙二十九年鄉飲介賓

馬翊宸字弼公康熙八年舉人能詩工書畫仕江西新淦縣知縣有惠政

夏紀字叔振康熙三十年進士性端嚴以古道自勵爲文精潔堪爲法式邑人士受業者多得科名除四川榮

昌令兼攝大足時兩邑居民寥落撫綏招徠民多歸之
二年卒於官著有制義彙經義彙

申頌字敬立涵煜子副貢生博學能詩疏宕有奇氣兼
工書畫郡事利弊知之最悉守令多諮以行喜獎勵後
進與人談忠孝節烈事竟日不倦晚授唐縣教諭不就
著有耐俗軒詩集課兒文訓

胡煦字仁風鳳閣曾孫祖孟南父咸吉康熙乙未進士
博學能詩獎勵後進十餘人爲詩社品其甲乙除江西
永豐縣知縣潔己愛民政治清平以忤上官罷貧不能
歸者三年豐民資以歸遂卒子在角乾隆元年進士著

學庸說註卮詞采宋以來諸儒之說而折衷於朱子今
存

王應辰字若園康熙四十四年舉人有才名詩不必中
格律而跌宕豪邁天才獨出有過人者

姚誼字咨懷好學以制舉業爲後進所師獎掖有方多
所成就

姚誦三讓會孫博學以白燕詩知名

林璫字玉相自申姚後詩學久不講璫與同邑金振聲
等結爲箴社時相切劘雖不及曩時壇坫之盛而意境
清切有足多者璫成雍正二年進士授編修體羸善病

貧不能給藥餌日拈毫苦吟多中晚佳句爲人傳誦
金振聲字啟元乾隆十三年進士博學能文有觀善堂
詩風格老成無叫囂語其所養有過人者居喪過毀致
疾遂卒所著四書講義周易管見行世

申居郿字邁公爲制舉業有各能詩困塲屋乾隆十二
年餼滿貢太學病目不復與試日與諸同志賦詩爲娛
好汲引後進多所成就士有貧困欲徙業者出已財資
之將卒猶俾其子瑄持筆口占歌詞百餘言乃絕年七
十有二

劉廷瓚字在中能詩臨川李穆堂侍郎甚推許之困諸
生以孝友爲鄉里所推乾隆元年舉孝廉方正未仕年
六十有六卒著有隨菴詩集十八卷便覽四卷

張尙哲字明遠諸生性孤介少與惟同邑申頴重之稱
其博雅恪謹孝友可尙能爲古文詞出入八家工四六
作詩亦有唐人風調

李法祖邑庠生以能詩稱無子所作均散佚

游清彥字國士乾隆五十三年舉人任三河縣教諭課
諸生娓娓不倦士人至今辨香祝之著有左傳集句

連國奇字秀鍾天性純篤嗜學工書作文有奇氣尤工
詩賦久躋棘闈中副榜四次至乾隆五十四年舉於鄉

時年已六旬矣官靜海縣教諭課諸生如子弟士風不
變年七十八歲卒孫長慶廩生

劉登元字貞木歲貢生博學能文主講文昌閣義學一
時登科目者多出其門子文焯貢生

王用和字仲禮歲貢生弱冠爲諸生旋食廩餼文各藉
甚秋闈屢薦不售教課生徒誘掖多方勤於講貫胞弟
用賢內姪夏發榮進士楊殿邦許尙德舉人杜寓麟皆
出其門子黼堂孫士銘俱游庠

郭天慶字同人家貧夔殮不繼受業劉登元之門讀書
於文昌閣樓上嘗達旦不寐嘉慶癸酉解元赴禮部試
屢薦不售攻苦以卒

翟彬字宜亭歲貢生善丈尺大字與張承恩齊各詩筆
雋雅或潑墨作山水人多珍之

譚復德嘉慶二十一年舉人篤實好學受業於李汝霖
年四十猶從師肄業請益不倦教生徒以勤儉樸實爲
務內行修謹撫兄之子如已子遐邇稱之

金奉璽字節堂振聲曾孫嘉慶癸酉拔貢生家貧篤志
於學工小楷尤長於賦錢塘鄭念橋先生最賞之官房
山縣教諭

武蔭棠字美如嘉慶癸酉拔貢生工楷法能詩學養純

粹接人無疾言厲色

鄭增修字竹坡道光五年舉人攻苦好學議論古今成敗娓娓可聽酷嗜顏曾公書能得其神味官曲陽縣教諭著有四書提綱

林昌基字丕承總曾孫道光乙酉拔貢生性沈靜能詩文工書安貧授徒終老邑人敬之

劉浩字養吾道光八年舉人讀書好深沈之思心力精專能究其奧旨制藝清雅堪爲式法尤工詩賦門弟子著籍甚多子照元庠生

李成顏字賢哉道光丁酉拔貢生天性超逸嗜酒工詩自以謫仙人復出也

李杰字偉人廩生少聰穎苦讀書制藝清刻而不沈晦秋闈屢薦不售積學早逝邑人士無不太息子鍾麟歲貢孫汝霖進士

王騰霄字凌雲咸豐元年舉人性端方渾厚少失怙授徒養母以孝聞友愛兄弟甘苦共之門內怡怡如也與人交寡言笑不苟取與暇輒與同志及後進之秀者聯社課文成就生徒甚衆二子皆游庠

杜寓麟字瑞徵少讀書明敏工舉業屢躋秋闈意豁如也益勤學不少怠咸豐九年舉於鄉年幾六旬矣郡司

延主講秀沼書院誨生童如子弟篝燈午夜口講指畫
丹鉛而甲乙之不以為勞尤加意植品浮華之士擯之
惟恐不速故遊其門者恂恂有矩度邑人或望而知之

永年縣志卷三十二

知縣事江陰夏詒鈺續纂

人物傳

材藝

戰國毛遂趙人秦之圍邯鄲趙使平原君求救合從於
楚約與食客門下有勇力文武備具者二十人偕平原
君曰使文能取勝則善矣文不能取勝則歃血於華屋
之下必得定從而還立不外索取於食客門下足矣得
十九人餘無可取者無以滿二十人遂前自贊於平原
君曰聞君將合從於楚約與食客門下二十人偕不外

索今少一人願君即以遂備員而行矣平原君曰先生處勝之門下幾年矣遂曰三年於此矣平原君曰夫賢士之處世也譬若錐之處囊中其末立見今先生處勝之門下三年於此矣左右未有所稱誦勝亦未有所聞是先生無所有也先生不能先生留毛遂曰臣乃今日請處囊中耳使遂早得處囊中乃脫穎而出非特其未見而已平原君竟與毛遂偕十九人相與目笑之而未發也毛遂比至楚與十九人議論十九人皆服平原君與楚合從言其利害日出而言之日中不決十九人謂毛遂曰先生上毛遂按劍歷階而上謂平原君曰從之

利害兩言而決耳今日出而言從日中不決何也楚王謂平原君曰客何爲者也平原君曰是勝之舍人也楚王叱曰胡不下吾乃與而君言汝何爲者也毛遂按劍而前曰王之所以叱遂者以楚國之衆也今十步之內王不得恃楚國之衆也王之命懸於遂手吾君在前叱者何也且遂聞湯以七十里之地王天下文王以百里之壤而臣諸侯豈其士卒衆多哉誠能據其勢而奮其威今楚地方五十里持戟百萬此霸王之資也以楚之強天下弗能當白起小豎子耳率數萬之衆興師以與楚戰一戰而舉鄢郢再戰而燒夷陵三戰而辱王之先

人此百世之怨而趙之所羞而王弗知惡焉合從者爲
楚非爲趙也吾君在前叱者何也楚王曰唯唯誠若先
生之言謹奉社稷以從毛遂曰從定乎楚王曰定矣毛
遂謂楚王之左右曰取雞狗馬之血來毛遂奉銅盤而
跪進之楚王曰王當歃血而定從次者吾君次者遂遂
定從於殿上毛遂左手持盤血而右手招十九人曰公
相與歃此血於堂下公等錄錄所謂因人成事者也平
原君已定從而歸歸至趙曰勝不敢復相士勝相士多
者千人寡者百數自以爲不失天下之士今乃於毛先
生而失之也毛先生一至楚而使趙重於九鼎大呂毛

先生以三寸之舌彊於百萬之師勝不敢復相士矣遂

以爲上客

史記 按遂爲邑人無考舊志以墓在永列人物今仍之

宋解暉洺州臨洺人父珪應募爲州兵後唐天成中西
征至劔門沒於陣暉少有勇力以父死戎事得隸兵籍
戍雁門與契丹接戰斬首七級獲酋長一人以功遷奉
國軍隊長晉天福中安重榮反鎮州因舉兵向闕至宋
城晉師逆戰大破之暉募軍中壯士百餘人夜擣賊壘
殺獲甚衆暉頻中流矢而攻戰自若顏色不撓以功遷
本軍列校周廣順初劉崇與契丹侵晉州暉從都部署
樞密使王峻等往援之暉率敢死士三千餘夜入契丹

帳擊之殺獲甚衆遷本軍第五指揮使從世宗征淮南
率所部下黃州禽刺史高弼遷虎捷第一軍都虞侯宋
初任步軍都軍頭從征澤州力戰目中流矢師還策勳
爲內外馬步軍副都軍頭建隆四年充湖廣道行營前
軍戰擢都指揮使潭州平降璽書獎諭僞統軍黃從志
據岳州暉率舟師討平之生擒從志及將校十四人俘
斬數千溺死者衆改控鶴右第二軍都指揮使領高州
刺史乾德六年詔領所部軍屯上黨從李繼勳略太原
開寶九年破太原軍於境上斬首千餘級獲馬三千匹
改均州刺史太平興國二年詔於潞州北亂柳石圍中
築城名威勝軍以暉爲軍使從征并州與尙食使石彥
贊率所部先下隆州殺并州兵三百餘擒招討使李詢
等六人以獻於行在所賜予有加復令與彥贊督戰士
隸城西行營分攻太原劉繼元降太宗以太原宮女三
人賜暉俄以功遷本州團練使知霸州雍熙初充雲應
寰州忻代等州都巡檢使三年代歸本郡涪化二年被
病上章告老改右千牛衛大將軍致仕詔未至而卒年
八十暉鷲猛木強每受詔征伐常身先之人所憚者暉
視之若甚易由是類立戰功金創遍體時稱驍將子守
顯至內殿崇班閣門祇候

丁德裕洛州臨洛人父審琦彰武軍節度使周廣順初以廕補供奉官宋初歷通事舍人西上閣門副使建隆三年遷東上閣門使從慕容延釗平荆湖以功授引進使又與潘美尹崇珂克郴州遷客省使乾德五年遷內客省使時成都初平羣寇大起用爲西川都巡檢使與閣門副使張延通同率師討之擒賊帥康祚磔於市歲餘盡平其黨頗與延通不協歸朝告其陰事延通坐棄市又奏轉運使禮部郎中李鉉嘗醉酒言涉指斥上怒驛召鉉下御史案之鉉言德裕在蜀日屢以事請求多拒之皆有狀御史以聞太祖悟止坐鉉酒失責授左贊善大夫未幾德裕亦出知潞州會征江南遣德裕爲常州行營兵馬都監領吳越兵助主帥進討常州平命權知州事又改昇州東南路行營都監敗潤州軍五千餘於城下及拔潤州移鎮常潤等州經略巡檢使德裕以傾險爲衆所惡恃勢剛狠不恤士卒黷貨無厭越人苦之錢俶奏其事貶房州刺史卒

明盧國讓字豎齋武科進士歷官遊擊屢立功坐殿職官戍邊大雪單騎巡邏望敵帥出獵潛身巖下伺其過而刺之中額取其皮帽以歸撫臣奏其勇補京營陞宣府八衛遊擊未幾以崛強歸後起遊擊終指揮同知


郭秉忠以祖亮護衛靖難功襲封寬河衛千戶狀貌魁梧好讀書知兵略庚午之變卒選鋒與敵戰連獲數級矢傳於面戰不衰主帥奇之未及敘功而卒

國朝李世馨字詒齋歲貢生性聰敏工小楷人多珍之咸豐同治間軍興修城濬池舉辦團練襄助之力爲多子承綸舉人經綸曾綸兆綸俱游庠

郝承宗字育德庠生才略明敏同治元年土寇犯境衆議築寨共推承宗爲首不日告成附近村民避其寨中存活者無算村人或習天主教承宗諭解之其勢浸微以積勞卒

朱明德儒童家素貧多病業賈咸豐年間東匪猖獗明德聯七團與練長武生王清和王福生屢率義勇助官軍禦賊同治六年冬聞西捻將渡河明德乃鳩衆集資築寨功未竣而卒明德子武生清和承其志不數月寨成七年正月賊至避寨中者莫不流涕稱朱君父子之功

王福生高固村人精拳勇從習藝者以千計性慷慨好義鄉人推爲練長東匪入境率團與戰丁家灣斬馘無算後賊見其旗幟卽竄避數村賴以安焉



永年縣志卷三十三

知縣事江陰夏詒鈺續纂

人物傳

隱逸

唐劉真字伯壽永年人會昌中為磁州刺史後寓居洛陽築室崧山下每登崧頂回則於峻極院中紀其歲月最後紀云今年若干共登崧嶺者七十四次矣後王道輔與其孫之靜遊院中作詩云爛紅一點出浮漚夜坐高峰頂上頭笑對松窗譚祖德當年七十四回游金玉礪字逸賓臨洛人後居於汴博學能文不就科舉

孝友天至非其食不食家無甌石之儲未嘗介意明昌中故相馬惠迪判開封舉礪德行才能就乞致仕隱居以老其詩爲明昌辭人雅製中七人之一

王政字子文永年人承安中進士資剛決不可犯爲尙書省掾知管差除與郎官忤卽棄官去往來登封盧氏山中改名知非字無咎又自號照了居士山居二十年布衣蔬食親操井臼時人多哀苦之知非自若文工駢體詩亦工正大壬辰參知政事宗室思烈行臺洛陽以知非有重名力致之使參議臺事城陷不知所終子昇卿有文名

元趙慶祥博學多聞邃於名理隱居不仕教授於湘潭之間學者多宗之

國朝張蓋字覆輿一字命士清癯狷介無俗物攫其懷少工制舉業文名藉甚學使者嘗相之曰子鶴形非富貴中人也性好詩輕脫不中繩尺解彈琴能不經師授按譜自成調家素貧不以貧介意竭貲力爲服飾綦履佩玉飄長帶如貴介甚都時入狹邪遊城頭水次則洞簫出諸袖中嗚嗚自得善草書法穰素體見紈楮輒書盡或有求書者遂不書故舊每欲得書輒匿紈楮不令見已自尋得之便索筆疾書惟恐奪去書成輒嘖嘖自喜

稍忤意即立毀之故遠近傳以爲狂士甲申後以次當
貢太學不受自脫諸生籍幅巾方袍混迹樵牧閒閉戶
獨坐讀杜詩歲嘗五六週詩遂精進近體得少陵神韻
而歌行絕句則雄放又類太白性落落寡合對客嘗終
日不一語或問之曰無所當語者以母氏菽水不繼閒
授徒自給性不耐未幾輒罷精通經書大旨所至人爭
延致之設講帳踞高座時發先儒所未發好獨行曠莽
林薄閒自作手語時人莫測也有哀其貧者贈以金道
逢一寒士語閒心動遂中分之不問姓名而去從故人
仕宦者遊楚晉閒數年相得甚歡忽發狂疾引錘自擊

其首被血滿面因自河東昇歸歸築土室自封屏絕人
迹穴而進飲食歲時一出拜母雖妻子亦不相見家人
竊聽之時間吟咏聲讀五經聲歎息聲泣聲母卒入室
成服已復入室如是者八年一日忽破壁出攜琴一囊
茗一壺欲走無何有之鄉其子急追之至清源而返有
司嘗慕其高風求一識面不可得時繼粟以餉之其子
受粟而不敢告偶入郡士大夫爭爲倒屣相與彈碁蹴
鞠者竟日次日折柬邀之則已逸去臥東橋土室中矣
年六十有六卒著有柿葉庵詩集刪定四書大全行世
申涵盼贊曰先生晦迹類袁閎疎散類魏野襟期類孟

郊而發狂自廢又絕類近世徐渭與家鳧盟為世外交
 稱莫逆而家觀仲又受業其門家鳧盟嘗刻其詩序之
 云迹蓋所為前後若兩人類有所感發然者蓋古獨行
 之流歟噫足覘相知矣申涵盼文集原傳
 姚謐字遜若御史二讓之曾孫也應童子試不售輒棄
 去喜為詩清切拔俗學使聞其名招之不往書亦有氣
 骨為時寶貴

永安縣志卷三十四

知縣事江陰夏詒鈺續纂

人物傳

藝術

隋劉孝孫廣平人開皇時與張孟賓同知厯事

金李慶嗣洛州人舉進士不第棄而學醫讀素問諸書

洞曉其義大德間歲大疫廣平尤甚貧者往往闔門病

慶嗣攜藥與米分遺之全活者眾年八十餘無病而終

所著傷寒纂類四卷改症活人書二卷傷寒論二卷鍼

經一卷傳於世

元趙世英字唐臣永年人父慶祥世以星厯名家世英學尤出諸父右嘗以自黃帝堯舜三代而後秦火之餘遺文殘缺漢興師法多門惟太和四分皇極大衍欽天爲最密然數一而所祖各別深心研考靡不精究其極孫德芳永年人幼篤學長師谷氏學按摩科延祐初舉爲太醫

僧從寬號虛閒本靈衆院僧泰定十二年來永年居大靈萬壽寺上堂有白氣見庭際虛閒曰吾當於此傳二燈後如其言

僧法清號玉山臨洛李氏子生於至元九年至明洪武十三年始沒清始於保慶寺落髮遭時變常不煙火食郡守陳汝楫造之見其把茅蓋頂自以爲足因賦詩曰洛城兵餘名刹稀止殘寶塔凌層暉孤燈四壁照金像風旛飄忽遊絲飛老僧龐眉有如許閉口不答塵世語庭樹干霄手自栽振錫空簷落寒雨我時乘暇尋禪關一經踏碎苔痕斑三生石上清夢覺梵唄聲入青雲閒明申任字小石幼習儒後學醫活人無算邑人稱爲醫聖守令皆禮敬之子炳字懷瀄諸生得父術用藥持重不求速效精診視務中窾要嘗曰射覆以視病鹵莽以投藥直以人命戲耳炳沒思之者多時以醫名者又有

范國卿字東溪周以道字道生

胡鯉字上池尚書瓚從元孫幼敏悟好醫術多讀諸方書讀已輒焚之覆誦皆上口遇農人弓尚賢於塗訝其色病爲診之曰明日午當死已果然鯉有族姪婦暴死診之曰當產血迷非死也且生男使人搗其齒灌藥而活果生男有方產而死者請鯉診之鯉索縫衣鍼鍼之遂母子俱活鯉中表李老人病篤鯉投藥二劑而起時李氏有名芝田者方陪鯉談笑鯉屬爲其治後事七日當死逾七日芝田果死李參政承蜩爲諸生時將赴京兆試鯉偶診之曰至趙州病當作逾試期乃愈竟如鯉

言饒陽路吏部名區病痢二年他醫皆以痢治弗瘳鯉診之腸癰也不欲面愧諸醫而暗投腸癰之劑遂愈諸醫感服旗校張琦妻病鯉曰胎爲藥誤死腹中左背爛矣投之藥果下男胎而左背爛婦無恙鯉所治皆應手活其不可爲者終不投藥從學醫者至百有六人莫能得其術晚以子福宏貴封兵部主事次子烈宏歲貢禧宏順治甲午舉人孫芝發順治丙戌進士戶部主事盧詔邑人精外科醫以濟人爲念不以遠近風雨爲辭亦不取人財有佛心神手之譽年九十一無疾卒子一孫三皆爲諸生

國朝劉敦寓字公碩國子生素性醞謹雅善岐黃遠近全活甚衆不論財雍正十一年巡視畿南御史評公圖病膈危甚延寓至一藥而愈贈以品端金玉匾額所著有胎產須知救急良方等書行世子文璣邑廩生張希載廩貢生少勤學游邑庠食餼試輒北慨然思所以自見改習岐黃之術施藥濟人活者無算家業爲之中落尤善痘疹常著痘疹精要集

永年縣志卷三十五

知縣事江陰夏詒玉續纂

人物傳

列女上

明申成妻李氏成卒子佐方襁褓家貧李紡績養姑以孝稱佐三爲法官李戒以慎刑後官大同巡撫李封淑人以節孝旌

宋某妻楊氏生子傑夫妻王氏生子儒愛之如一而傑夫婦忌儒百計害之氏曲爲保護傑後官闕全家疫死儒傾產舁柩歸氏壽九十卒儒舉人安邱縣知縣

胡文舉妻武氏文舉苦學篝燈夜讀武紡績與俱聲相
閒督諸子嚴次子瓚爲御史當封父母文舉不受武怡
然後封淑人

杜廓妻申氏歸三年廓卒前妻遺孤汝亮與二女申撫
以守志備極勤苦坐臥一小樓課汝亮讀書已紡績與
俱常至夜分汝亮舉於鄉申卒督學表其門曰貞婦慈
母

劉尚卿妻孫氏尚卿官宜陽知縣孫教子嚴諸子恪守
禮法天啟四年孫鏡鏗同舉於鄉孫氏謂諸子曰兩孫
捷若輩奈何越六年長子慶孫亦捷鏡慶孫子也

李杜繼妻方氏生子春蓁四年杜卒方教春蓁嚴前子
春華春萼皆已知名督春蓁率兩兄教春蓁成進士爲
武昌推官居官廉以養薄爲歉方曰養親何必備物第
思所從來耳爾父不積產其積在德繼志之謂孝養焉
用隆哉

杜妾陳氏杜卒方氏以年少將遣之去氏泣曰妾與夫
人年等耳夫人守節忍俾妾事二姓哉方爲慟哭重愛
之諸子事之如母春萼官忠州知州迎之不往春蓁官
武昌乃從方氏就養秩滿歸卒於舟春蓁疏請與方俱
旌表

申化繼妻軒氏生子佳允方六歲化卒家貧軒守節撫孤紡績以給佳允貴軒猶時時教督之甲申春在京邸佳允以牧事出巡近郊寇急軒曰吾子必來佳允單騎至軒喜曰吾固知汝來也佳允既死軒曰有子作忠臣復何憾歸十年卒佳允爲吏部時以軒守節狀請得旌李養廉妻馬氏事姑至孝子芳澹進士知縣封孀人

申佳允妻靳氏父一鶚有人倫鑒遇佳允於途奇之遂以女歸之佳允貧一鶚資之讀書佳允殉難時靳在籍幾死者數姑軒歸自京邸靳委曲勸慰不敢晝夜哭子涵光涵煜涵盼皆知名勅涵光約束兩弟無得干一外事交一損友涵盼官翰林就養京師感佳允死節處大

慟遂搆疾卒

右十人舊志賢母

楊鐸妻郝氏鐸死郝年少無子自縊以殉

郝禮妻胡氏年二十夫卒胡孝事舅姑撫子成立巡撫陳詢爲作詩有一節曉霜飛翠竹寸心寒月湛冰壺之句壽九十八無疾而卒其女適生員李貢年二十三貢卒無子亦守節至八十二歲卒

趙奉妻孟氏縣丞孟通女奉父縣丞雲奉卒或勸之改適孟曰吾忍玷兩家清白耶誓死自守年七十餘卒有司奏聞旌表

郭瑛妻申氏父達官汝甯知府與汝甯千戶郭昇善以女歸其子申習內則通孝經大義執婦道甚謹瑛病篤氏自割左臂肉和粥飯之病革執氏手以哭氏以首觸地流血如濺剪髮垂盡割左耳過半以誓靡他瑛卒姑張氏年老遺孤未週歲氏仰事俯育備極酸辛年三十卒未及老格於例不得上聞閏癸丑子興襲職贈宜人莆田林孟為傳載汝甯府志

杜貴妻李氏年二十五夫卒無子苦節四十餘年守令表其門

申朝妻王氏年十七歲朝卒一子亦隨亡家貧甚艱苦自守清白之操始終如一年七十餘卒

姚朋妻胡氏主簿欽女也朋父主事姚斌朋卒無子氏年二十三或勸改適氏厲聲曰若然何面目見吾父吾舅於地下守節三十餘年卒

張訪妻徐氏參政徐政女也嫁十月訪卒有遺腹再逾月生子家貧舅姑老氏孝養撫育勤織絰供甘旨撫子成立舅姑皆失明奉事周至守節四十餘年卒

同知徐銳妾劉氏李氏史氏銳卒無子三氏皆少勢家謀娶之終不能奪郡守蔣彬表曰一門三節
魏明妻張氏明早喪家貧張撫幼子勤織絰教子讀書

子爲諸生孫枝蕃衍人以爲苦節之報旌表

馬出圖妻王氏同知王鍵女出圖卒遺孤九歲姑老多病家貧氏躬紡績以養教子成立辛苦萬狀

王濤妻李氏舉人李琰女年十九生二女而寡家貧織絀以給終其身旌表

義民史盛妻王氏美姿色正德閒爲流賊所執欲污之氏罵不從賊怒殺之剖其腹

翟昭妻侯氏年十七夫喪遺孤方數月家甚貧父母欲奪之氏斷髮明志守節終身

張文秀妻胡氏夫卒欲殉家人防之哀痛數絕有以家貧子弱諷者卽自斷髮毀面嘉靖七年巡按李朝綱奏聞旌表

冀爲梅妻竇氏舅永昌宦萊州子婦從翁宦邸翁忽嬰疾親供藥餌以孝聞舅歸夫病竇籲天求代夫卒撫遺孤守志終身

肥鄉郭東妻王氏邑人女也東早卒氏年十九朝夕號泣絕而復甦會有求娶者氏輒欲死終不可奪守節終身

張五采妻史氏夫歿氏少無子誓死以守族人爲立公彌公佐爲嗣苦節教子三十年卒

王氏民家女甫十一與姊同事女紅動止相偕姊年漸長頗不謹女以厲言禁止姊不聽女恚遂投井死後其姊自言之并在今府學大門內事在嘉靖年間

李希顏妻王氏年十七適希顏歲餘夫死氏痛泣三日不食縊死希顏柩前知縣王爲立碑

王廣妻武氏年十九生一子廣病瘵死武誓不獨生家人守之已而稍疎遂縊死廣柩側事在萬曆十五年旌表

胡養蒙妻段氏蒙卒氏年二十九歲遺孤二長子鯉方數歲次子鮪尚在襁褓衣食艱難繼姑張氏逼之改適

氏誓死守晝夜紡織以給二十年如一日張亦悔重而愛之卒年六十有五郡守南居易表其門孫福宏任至按察使禧宏主事

申吉妻李氏守節六十八年壽八十七歲知府蔣以忠表其門曾孫爲憲仕至副使

冀有奮妻石氏奮卒誓守志期年間有密爲納聘者大哭夫墓前遂縊死旌表

盧機妻張氏監生可賢女生子穎達機早卒氏守節教子讀書有聲庠序閒穎達生二子夫婦俱亡氏教養兩孫備極艱苦年七十八歲卒孫贊立崇禎丙子舉人

楊守敖妻劉氏夫死劉日夕痛哭越七日自縊以殉
和大金妻張氏歸四年大金病卒遺孤二歲舅姑皆年
六十餘家貧氏苦志守節有勸改適者輒以死自誓歷
十餘年翁姑相繼亡氏竭力營葬子毓秀中副榜旌表
李球彝聘妻王氏雞澤諸生璽女崇禎十一年遭兵亂
死節裹衣千紉縫結面色如生李感其義迎葬先塋
王儼若妻馬氏同知馬之麟女也儼若歿氏甫十七歲
誓死以守舅姑憐之爲立嗣守節五十餘年旌表
李之彥妻孟氏夫卒無子氏守節求族人爲立嗣不得
訟於官官復曲法沮之氏歸撫棺大慟自刎而死崇禎

八年旌表

胡廷器妻吳氏鄉民宗尹女也崇禎十六年春歸寧值
驕兵肆掠挾宗尹夫婦及氏同行氏給之曰二親老徒
累人耳不如遣之去兵許之氏度去遠忽投河兵挽之
不得遂大罵兵怒支解之

韓策二女姊妹皆及笄戍寅避亂臨洛鎮城破義不受
辱俱死之旌表

陳良策妻申氏夫卒氏方二十四歲家貧無子紡織以
給守節五十年卒

趙鐸妻張氏鐸年十八歿家釁內作有以勢分相挫辱

者氏曰吾夫尙無後倘遺腹生男雖受窘迫無恨也後
果舉子教以成立

武周妻胡氏周死三日胡乘公姑偶出縊死夫柩前
劉廷棟妻李氏遇亂被執不從投井死

胡沾愛妻李氏年十八生子六十日夫卒氏矢志守節
躬紡績養舅姑疾隆冬單衣露禱雖大風雪不避教子
讀書成立

張崇溫妻秦氏崇溫死越月秦遺腹生男貧不能自存
或勸他適氏曰縱無子尙當死守况有子乎苦節終身
張崇耿妻武氏崇耿病篤與家人訣不及武武大慟曰
君以我年少無子將負君以途人視之耶崇耿亦泣崇
耿死武矢志守節五十後喪明又若干年卒武與秦氏
稱一門二節云

張一點妻周氏年十八歲守節至八十一歲卒

胡納玉妻龐氏知縣進賢女十六歲適納玉三載夫亡
氏數自盡救之甦矢志守節六十餘年如一日

宋學聚妻劉氏年二十七夫亡事孀姑盡孝撫孤永續
成立守節四十九年年七十六卒永續舉人

穆席珍妻梁氏席珍護母被賊殺氏亦遇害俱旌表

李春素妾馬氏京師人甲申流寇敗挾春素及氏西行

至宜溝驛乘閒自縊死

國朝鄭之望妻方氏年二十四夫亡事舅姑以孝聞撫子茂慈誨兼至不為姑息愛庶子蕃先繼夫伯兄為嗣伯兄有子聽蕃歸愛之與茂同析產會親族鬪分之人以為難守節四十餘年年六十四卒

張五美妻方氏年二十三歲五美卒子鴻基方一歲氏

撫孤守節備極艱辛守節五十餘年卒鴻基官知縣

右
人舊志

賢母

甯三樂繼妻馬氏父進禮氏年十六歸三樂事姑孝撫前室子知己出二十二歲夫卒遺孤二長光祖僅三齡

次光允甫二歲氏勺水不入口者數日既毅然曰親老子幼夫死皆我責也乃強起進食紡績奉姑誓不改適終其身無怨言年七十八歲卒康熙二十三年 旌表

爾讀爾講其孫也

胡天眷妻任氏年二十五歲守節四十餘年康熙二十八年 旌表

盧愜允妾方氏臨清人愜允卒方年十六無所出嫡欲遣去流涕懇請誓不再適守節以終康熙二十九年 旌表

李芳潤妻郝氏芳潤病篤氏于歸俗曰喜衝氏未見夫

而寡紡績苦守親族罕見其面守節六十餘年年八十卒康熙三十年 旌表

趙一鸞妻張氏張斐女生一子未幾夫卒家貧氏日夜紡績奉姑教子讀書康熙四十年歲大饑食草子木皮守節五十餘年子振宋游庠康熙三十五年 旌表

劉格妻張氏格早卒無子父母以其少欲嫁之矢死不從勤紡績以自給守節五十餘年康熙五十年 旌表
李復隆妻胡氏巡撫沾恩女孫也年二十夫卒舅姑老前妻子幼氏所出土傑甫三歲愛之如一康熙五十三年 旌表

王于燕妻趙氏于洛妻崔氏妯娌也于燕早喪遺一子趙年二十或勸改適厲聲曰我以親老孤幼未死耳自是無敢言者既而于洛亦卒崔歸甫兩月與趙矢志同守紡績養親撫孤趙以孫嗣崔一門雙節乾隆二年 旌表

趙昌樑妻解氏夫官永年訓導年二十八而寡遺腹生子辛勤守節貧不能歸郡守王嗣衍置田贍之遂占籍永年乾隆三年 旌表

劉廷璋妻王氏夫亡奉舅姑盡婦道翁姑歿每食必祭祭必泣下年至七十餘哀慕弗衰教子皆成立次子毓

瀚爲名諸生乾隆五年 旌表

宋忠妻郝氏年二十五夫亡矢志靡他撫孤守節乾隆五年 旌表

郭兆麟妻李氏年二十二歲夫亡撫孤守節乾隆六年 旌表

冀如鏡妻王氏夫亡撫孤守節事姑盡孝乾隆六年 旌表

姜璽妻崔氏年二十五夫亡撫孤守節三十五年乾隆八年 旌表

李克鎔妻秦氏年二十五夫亡守節四十五年乾隆九年 旌表

楊敦禮妻趙氏年二十五夫亡孝奉舅姑撫孤汝恭汝寬不姑息俱入國學乾隆十年 旌表

楊智妻郝氏年二十八歲夫亡遺孤汝良甫三月氏孝事舅姑勤紡績給衣食教汝良嚴有過必飭責因涕泣不食汝良稱長者入國學守節四十餘年乾隆十年 旌表

旌表

趙丞妻王氏丞亡氏年二十一歲無子並無可嗣者矢志守節後數年立叔子時泰爲嗣家素貧舅姑年老氏紡績供養以孝稱課子讀書成立食餼邑庠爲知名士

人咸謂得之母訓守節五十餘年乾隆十一年 旌表

甯儀妻夏氏年二十四歲夫亡遺孤甫週歲夫有弟數

歲夏撫叔與子如一家貧紡績以給守節四十餘年卒

乾隆十二年 旌表

曹慧妻賈氏年十七夫亡事祖舅姑舅姑盡孝撫孤士

俊成立士俊入國學乾隆十二年 旌表

李如蘭妻郭氏年二十二歲夫亡事舅姑盡孝父母逼

他適氏以死自誓有鄰婦譬說百端終不能奪其志守

節四十餘年年六十二歲竟以餓死亦無子最為苦節

乾隆十三年 旌表

張秀妻李氏年二十八歲夫亡遺孤繼良生七月氏孝

事姑撫繼良紡績以給守節五十餘年卒年八十餘歲

乾隆十三年 旌表

劉源妻韓氏年十九歲夫亡遺孤尙未週歲家甚貧孝

養舅姑勤紡績以給撫孤成立乾隆十三年 旌表

靳逢源妻葉氏年二十六歲夫亡孝養舅姑作苦給朝

夕遺孤桂年方二歲撫之成立乾隆十四年 旌表

李求條妻劉氏年二十七歲夫亡事孀姑以孝聞遺孤

殤或勸改適氏以死自誓以夫兄延佐孫為嗣撫之成

立康熙四十三年歲饑出粟百石貸鄉人後悉焚其券

乾隆八年卒年八十一歲守節五十五年乾隆十七年旌表

趙先型妻武氏年二十六歲夫亡遺二孤家貧未克葬氏紡績勤苦孝養舅姑積六年乃葬夫二孤成立教以義方次子爲諸生氏於雍正五年卒年七十七歲守節五十餘年乾隆十七年旌表

劉登美妻趙氏年二十四歲夫亡苦志守節四十年至乾隆二十年旌表

劉可忠繼妻解氏年二十二歲夫亡撫孤成立夫弟二人久未葬解使葬之如葬父禮雍正五年卒守節三十一年乾隆二十一年旌表

申覲宸妻劉氏年二十四歲夫亡引刀自裁舅姑救之諭以守節爲難劉聽命事舅姑孝撫遺孤成立課之讀書甚嚴子夢麟爲諸生食餼邑庠孫成章乾隆十八年舉人守節六十六年乾隆二十一年旌表

張淳妻邢氏年二十六歲夫亡誓死守節撫孤永祐成立爲諸生守節四十一年乾隆二十一年旌表

劉愷妻姚氏年二十一歲夫病篤屬氏善視二子氏斷中指一寸以誓無他愷死或慙懇他適氏截髮刺面乃已舅姑歿喪葬事獨任之不以援夫伯兄人以爲難二

孤皆成立守節四十四年乾隆二十一年 旌表

王治妻杜氏年二十五歲夫亡遺孤方三歲矢志守節
事舅姑盡孝教子朝樞讀書成立爲諸生守節四十二
年乾隆二十一年 旌表

楊正妻時氏年二十五歲夫亡數求死其父時宜邑諸
生諭曰舅姑在子幼而死非義也乃矢志守節事舅與
繼姑盡孝撫孤成立課之讀書甚嚴子爲諸生有名守
節四十一年乾隆二十一年 旌表

孫芬妻婁氏年二十七歲夫亡矢志不渝撫孤輝祖成
立爲諸生守節三十一年乾隆二十一年 旌表

楊之孚妻馬氏年二十一歲夫亡矢志不再適旣服除
翁與父謀嫁之氏聞跪請於姑曰曩之所以不卽死者
正以代夫事翁姑耳而忍見棄耶翁意終不可回一日
父有使至翁所切切耳語婦泣然淚下曰是必爲我值
元日謁夫墓痛哭乃回潛服毒家人強救甦之至七日
再服毒遂死

任來貴妻張氏馬到固村張輔良之女也年十七于歸
十八夫亡氏有遺腹企生男延夫嗣舅與父逼之他適
誓不從竟以娶者至門自縊邑令丁應蕙表其門

馬翊宮妻李氏年二十八歲夫亡遺孤懃始週歲姑在

殯氏竭力營葬撫孤成立守節三十一年年五十九歲卒懃爲諸生有名

邢梅妻李氏年十六于歸三月夫亡家貧或勸改適氏誓死不從事繼姑盡孝以夫從子培基爲嗣撫之成立艱苦萬狀爲培基娶李氏生子九歲培基卒李氏亦矢志守節姑婦併勤紡績家稍裕姑守節五十五年年七十一卒婦守節三十八年至乾隆二十一年年六十八矣

孫楨繼妻趙氏雞澤趙昌祚之女年十七歸楨二十九夫亡將殮氏撫棺痛絕指壓棺蓋下不自知久乃解救

舅姑年皆八旬氏竭力奉事撫前子與己子如一紡績以給守節四十二年年七十一卒孫宗武宗成庠生

鄭元昊妻宋氏年二十五歲夫亡遺二孤思恭四歲思讓方二歲家甚貧氏紡績奉孀姑撫孤成立後家道頗裕皆氏勤儉所致

張步鰲妻李氏年二十九歲夫亡遺孤三長瓚次珍珠氏矢志守節奉姑孝教子嚴瓚舉武鄉試珍諸生珍與璫早卒其妻皆守節

珍妻王氏年二十三歲珍卒孤朝尹方數月氏撫養備極艱辛乾隆二十一年氏守節三十一年矣

璉妻申氏雍正五年夫亡年二十一歲數自裁夫兄瓚

以子朝卿嗣乃矢志撫孤朝卿未冠為諸生未幾天更

以夫兄孫嗣朝卿乾隆二十一年守節三十年

劉公勤妻趙氏年三十四歲夫卒於外家貧甚舅姑皆

七十餘遺孤四歲氏奉舅姑孝竟以紡績所得歸夫櫬

安葬撫孤成立氏年五十卒

單志遠妻段氏諸生段成珩之女也年二十六歲夫亡

家貧氏孝事舅姑撫二子一女以守未幾二子相繼殤

或勸他適氏以死自誓守節五十四年備極辛苦年七

十九卒

吳譽揚妻李氏年十七于歸生一子夫亡矢志守節夫

弟顯揚亦卒無子其妻劉氏守節妯娌相依同撫孤成

立孤生二子以一嗣顯揚後李年八十卒劉年七十卒

孟金美妻崔氏年十九夫亡矢志守節五十九年年七

十八卒

宋永續妻張氏年二十四夫亡事孀姑盡孝教子讀書

成立年七十卒守節四十七年

宋如備妻崔氏沙河舉人燦之女年二十六夫亡守節

四十六年年七十二卒

張鳳來妻李氏年二十夫亡家貧誓死以守奉舅姑盡

孝紡績以給撫孤成立爲諸生孫亦入庠氏見曾孫四
八康熙五十七年卒年七十二歲守節五十四年

段成璋妻郝氏年二十一夫亡家貧事孀姑紡績以給
以夫從子爲嗣慈誨兼至家漸裕教孫三元讀書氏以
康熙五十九年卒年六十八歲守節四十七年三元後
舉於鄉三才成進士

蘇寅陽妻尹氏年二十六歲夫亡孝事舅姑撫孤成立
康熙五十八年卒年六十七歲

郭儀宗妻陳氏年二十九歲夫亡家貧紡績奉舅姑教
子讀書爲諸生知名家亦略給氏雍正四年卒年八十

歲守節五十二年

宋殿邦妻張氏順治十八年夫故年二十三歲孝養舅
姑撫子成立雍正五年卒年八十九歲守節六十六年

徐潤生妻高氏年二十七歲夫亡遺孤方二歲舅姑亦
相繼卒有田五十畝覬覦者衆氏誓死撫孤家漸裕孫
入太學氏於雍正十年卒年八十歲守節六十三年

張振有妻蘇氏年二十二夫亡家貧甚矢志守節奉舅
姑紡績以給撫孤成立雍正十二年卒年七十九歲守
節五十七年

程鯤妻任氏年二十夫亡遺孤長壽甫三月舅姑年老

氏紡績以給舅姑歿母黨欲嫁之氏怒曰我死不累母家何逼我爲自是無敢者氏亦不復歸寧長壽旣長庸劣家事皆氏主持爲長壽娶石氏夫婦皆天亡以從孫一清爲之後氏守節五十四年年七十四歲乾隆三年卒

杜楷繼妻李氏年二十七夫亡撫前子三與已子如一前子長者早卒撫其子女甚至舅姑早歿夫弟梅亦賴以成立氏至乾隆五年卒年七十四歲守節四十八年宋經邦妻王氏年二十四夫亡家貧矢志守節孝養舅姑撫孤成立乾隆六年年九十二歲卒守節六十五年

祁桐妻韓氏年二十九夫亡遺孤甫三月數求死舅姑諭以大義乃矢志守節奉舅姑以孝稱撫孤成立家甚貧氏以勤儉故致小康乾隆十年卒年八十二歲守節五十年

傅元標妻楊氏二十五歲夫亡時遺孤二長六歲次四歲氏孝養孀姑撫二子成立乾隆十一年卒守節四十三年

杜斯美妻盧氏二十五歲夫亡家貧事孀姑孝遺孤衛龍方週歲次年衛龍患驚風絕氣盧仰天大號引刀自裁爲鄰婦奪去即跳入井救出衛龍竟甦盧从方覺人

因名其井曰恩井衛龍成立有名諸生間氏乾隆十二年卒

苗永茂繼妻崔氏年十九夫亡子未週歲族人有逼之他適者誓以死乃已撫孤成立至乾隆十四年卒年六十九歲守節五十年

楊輔妻杜氏年二十二夫亡撫一子一女以守子女皆殤以夫姪爲嗣氏於乾隆十四年卒年五十八歲守節四十二年

段澤綿妻張氏年二十三夫亡家貧遺一女矢志守節以夫姪重陽爲嗣撫之成立紡績甚勤家漸裕重陽歿氏遭疾至乾隆十六年卒守節二十五年

王正宗妻張氏邑人女也正宗藁城人任清河千總占籍永年既卒氏年二十三歲矢志守節妾呼氏年二十七歲亦自誓守節至嚼指流血乃相依以守撫孤成立爲授室補博士弟子生三子而卒妻彭氏奉姑守節撫三子成立長子次子爲諸生三子舉乾隆十八年武鄉試張氏於乾隆十六年卒守節五十三年彭氏至乾隆二十一年卒守節三十六年

秦贊乾妻牛氏年二十四夫亡家貧惟一孤女舅姑諭令改適氏誓以死舅姑憫其無子氏曰世亦有無子者

若棄舅姑罪滋大且辱亡人地下舅姑感而泣下至乾隆十七年卒年八十四歲守節六十年

張福益妻鄭氏年二十五夫亡誓死守節姑老失明盡心扶持撫二子成立諸生秉正其孫也氏於乾隆十九年卒年七十九歲守節五十四年

劉正學妻張氏年二十三夫亡事孀姑撫孤子備極艱辛乾隆二十年卒年七十二歲守節四十九年

姚建學妻張氏年十九夫亡事舅姑盡孝姑八旬臥病氏日夜奉侍三年不懈以從子生芹爲嗣紡績易菽粟以活撫孤成立守節五十四年至乾隆二十年卒

單璠妻冀氏年二十六夫亡家貧遺孤七歲或勸他適輒不食聞有異議投繯者再舅乃聽守節紡績以給撫孤成立乾隆二十一年卒守節四十七年

孟衍道妻姚氏年二十夫亡矢志守節以夫族子爲後撫之成立乾隆二十一年卒守節四十五年

趙鳳翊妻魏氏年二十七歲夫亡家貧撫幼子守節有勸之改適者氏引刀截髮又以火自燒其眉自是無敢言者紡績奉姑撫孤成立至乾隆二十一年氏年九十五歲守節六十餘年

郭守信妻武氏年二十八歲夫亡家貧繼姑趙病不能

動移者數年氏朝夕扶持以孝稱撫孤允龍成立乾隆二十一年卒守節五十九年

孟遵閔妻宋氏年二十八夫亡家貧矢志守節孝事舅姑撫孤成立乾隆二十一年氏年八十六歲守節五十八年

張居智妻杜氏年二十三夫亡家貧矢志守節以夫族子調陽爲嗣紡績自給撫調陽成立乾隆二十一年氏年八十四歲守節六十一年

胡煇妻裴氏年二十六夫亡子曰璉甫週歲舅姑老家貧氏勤女工奉舅姑曰璉娶婦曹氏生子政七歲曰璉

卒曹氏守節又卒裴撫幼孫備極艱苦夫爲明尚書璣之裔書籍誥勅氏謹守無失邑人以爲難乾隆二十一年氏年八十三歲守節五十七年

李必湯妻張氏年二十七歲夫亡家貧矢志守節奉舅姑孝姑失明飯食須氏持飼撫孤成立夫弟三人以母失明皆氏撫之成立乾隆二十一年氏年八十二歲守節五十五年

程侯宋妻林氏年十九夫亡舅姑亦相繼卒氏營葬盡力以夫堂姪爲後時甫三歲恩勤撫育教之從師讀書至乾隆二十一年守節六十一年

杜召拔妻陶氏年二十九歲夫故乾隆二十一年年七十五歲守節四十六年

冀方熾妻趙氏父孕槐冀州廩生氏年十七適方熾二十五夫亡無子舅姑相繼卒氏喪葬如禮以夫姪璽爲嗣先是氏舅姑卒議嗣未定氏舅爲尙書如錫長子氏以義索嗣不能得夫叔父棟方官副都御史在京師氏遂入都求棟爲主乃以姪璽嗣撫之成立爲諸生乾隆二十一年氏年六十七歲守節四十三年

趙節妻王氏年二十六歲夫亡家貧無子矢志守節事舅姑以孝稱撫夫姪樸爲嗣爲娶婦生子席珍樸卒氏撫席珍成立備極辛苦乾隆二十一年氏年六十七歲守節三十九年

賈暹妻武氏年十九歲夫亡曾祖姑胡老艱於動移祖姑劉失明姑薛亦病廢皆氏扶持起居備極艱苦以夫從子爲嗣至乾隆二十一年氏年六十六歲守節四十八年

冀天祥妻李氏年二十八夫亡矢志守節撫孤克聖成立爲諸生至乾隆二十一年氏年六十五歲守節三十七年

劉敦孝妻苗氏年二十六歲夫亡舅祚昌貢生也患瘡

疾半年氏奉事無懈舅將卒親書氏貞孝狀送其母家
氏撫二孤成立至乾隆二十一年年六十四歲守節三
十九年

張自有妻李氏年二十九歲夫亡舅姑老遺孤長纔四
歲父母欲嫁之誓死不從紡績養舅姑二子年稍長俾
拾薪以給後皆成立乾隆二十一年年六十三歲守節
三十四年

趙輔繼妻李氏年二十九夫亡孤時和年十歲撫之成
立家頗裕親族賴周給者衆乾隆二十一年守節三十
四年年六十有三

武義龍妻李氏年二十歲夫亡無子矢志守節奉舅姑
孝以夫從姪元臣爲後舅姑毓育一子舜鳳相繼卒李
撫舜鳳成立乾隆二十一年氏年六十二歲守節四十
二年

韓煥妻龐氏年二十六歲夫亡遺一幼女氏有遺腹或
勸他適氏截髮以誓逾三月生子紡績養舅撫子成立
乾隆二十一年年六十二歲守節三十七年

甯振文妻李氏年二十六夫亡遺孤在襁褓矢志守節
奉孀姑盡孝撫孤成立乾隆二十一年年六十二歲守
節三十六年

秦方泰妻賈氏年二十六夫亡遺一妾誓死守節事祖姑舅姑盡孝夫弟爲諸生重氏守節事之如母氏至乾隆二十一年卒守節三十四年

宋如瑞妾王氏耿氏如瑞官守備卒時王年二十七歲耿年二十四歲嫡早亡惟耿氏有子方三歲王與耿相誓以守近屬不逞者利孤幼弱逼王耿他適耿善病大慟欲自裁王以理與之爭要戚黨不從將鳴之官羣不敢逞子名志仁二氏撫之成立愛之均無異志仁事兩母亦無異乾隆二十一年二氏守節三十四年

楊斌妻張氏年二十九夫亡絕食數日姑諭以養老撫孤乃矢志守節姑失明氏朝夕扶持撫孤秀生成立課之讀書甚嚴秀生爲諸生有名乾隆二十一年氏年六十一歲守節三十二年

斌弟端妻郝氏年二十五端卒氏矢志守節與嫂張氏左右奉孀姑俱以孝聞遺孤士傑早歿撫幼孫成立乾隆二十一年年五十五歲守節三十年

鄭天佑妻籍氏年二十六夫亡事祖姑與舅姑盡孝撫三歲孤成立備極艱辛乾隆二十一年年五十九歲守節三十四年

宋懋勉妻楊氏年二十四夫亡撫嗣子成立乾隆二十

一年氏年五十六歲守節三十二年

梅贊化繼妻張氏年二十六歲夫亡孝事舅姑撫前子

廷棟成立為諸生七年卒氏撫兩孫備極辛苦乾隆二

十一年守節三十年

盧化龍妻郭氏年二十一夫亡家貧遺孤二歲氏工刺

繡鬻以奉舅姑撫孤成立乾隆二十一年氏年五十五

歲守節三十三年

申居邵妻甯氏年二十四歲夫亡舅姑老遺孤二歲氏

矢志守節養親撫孤備極艱辛乾隆二十一年年五十

五歲守節三十一年

賈璠繼妻盧氏年二十三歲夫亡奉舅姑孝撫前子若

已出前子早歿哭絕者數次乾隆二十一年年五十四

歲守節三十一年

曹興業妻郭氏年二十歲夫亡舅姑年老氏盡心奉侍

作苦以給以夫堂姪為後為援例入國學至乾隆二十

一年守節三十三年

王改名妻馬氏年二十一歲夫亡遺腹生女矢志守節

乾隆二十一年守節三十一年

金雲瑛繼妻杜氏年十八歲夫亡前妻遺子與女各一

氏父兵也將以氏他適氏委曲諫譬卒得完節撫子成

立乾隆二十一年氏年五十一歲守節三十四年

右前志列女傳一百六十九人為編次時代據府志增

入者三人

